

Mid-Day Dogri News Bulletin, 15th April 2025

समे — 12:25

<><><><><><>

Yatra Registration

2025 बरें दी श्री अमरनाथ जी दी यात्रा लेई नां दर्ज कराने दा कम्म कल्लै थमां शुरू होई गेआ ऐ। आकाशवाणी दे जम्मू संवाददाता नै जानकारी दित्ती ऐ जे 52 दिनें तोड़ी चलने आली एह यात्रा 3 जून गी शुरु होइयै 9 अगस्त रक्खड़ पुन्नेया आले रोज सम्पन्न होई जाग। श्री अमरनाथ जी श्राइन बोर्ड दी वेबसाइट पर ऑनलाइन दे इलावा, यात्रा दी इच्छेआ रखने आले श्रद्धालु ऑफलाइन पर बी अपना पंजीकरण कराई सकदे न जेहदे लेई मुखय दे बक्ख-बक्ख हिस्से च नामजद 540 बैंक शाखाएं च बी एह सुविधा दित्ती गेदी ऐ। एहदे इलावा जम्मू शहरे दे पंचैत भवन, वैष्णवी धाम ते महाजन हाल च बी श्री अमरनाथें दी यात्रा लेई नां दर्ज कराने दी सुविधा उपलब्ध कराई गेदी ऐ। जेहदे लेई रजिस्ट्रेशन फीस 220 रपे रखी गेदी ऐ। श्राइन बोर्ड मूजब इक दिनै च छडे 15 जहार लोकें गी गै यात्रा दी इजाजत दित्ती जाग। यात्रिणं दी सुरक्षा लेई लोडचदे सबै बंदोबस्त कीते जा8रदे न ते यात्रा दरान कोई श्रद्धालु कुत्थें पुज्जे दा ऐ। ओहदे लेई हर बारी आला लेखा ऐकती बी आरएफआईडी कार्ड बनोआना लाजमी रखेआ गेआ ऐ। इस बारे होर जानकारीलेई यात्री बोर्ड दी वेबसाइट जां टोलफ्री नंबर 1800 180 7198 जां 1800 180 7199 पर संपर्क कीता जाई सकदा ऐ।

<><><><><><>

Poonch-CASO

पुंछ जिले दी सूरनकोट तहसील दे जसाना ग्रां च सुरक्षाबलें आस्सेआ घेरा पाइयै तपाश आली कारवाई दे मगरा आतंकवादिएं दा पता लाई लैता गेआ ऐ। इक वरिष्ठ पुलिस अधिकारी नै आखेआ ऐ जे जंदी रातीं घटना आली थाहरा पर एह जकीनी बनाने लेई कारवाई कीती गेई जे आतंकवादी न्हरे च नस्सने च कामयाब नेई होइ जान। इलाके च किश आतंकवादिएं दे मजदूगी बारे सूह थोने मगरा फौज, पुलिस, एसओजी ते नीम फौजी बलें दी सांझी टीम नै कारवाई करदे होई इलोकें दी घेरी लैता हा। फौज दे इक जनसंपर्क अधिकारी कर्नल सुनील वरतवाल होरें आखेआ जे इलाके च गोलियां चलने दी अवाज बारे आई दी खबर सच ऐ ते तौले इस बारे होर जानकारी गी सांझा कीता जाग।

<><><><><><>

Dy.CM-Public Darbar

उपमुख्यमंत्री सुरिन्दर चौधरी होरें नौशेहरा दे लाम ग्रां च जनता दरबार लाया ते आम लोकें दी दिक्कतें शकैतें ते विजिब मसलें गी सुनेआ। समाज दे बक्ख-बक्ख तबकें दे लोक इस जनता दरबार च शामिल होए। लोकें मूल ढांचे दे विकास ते बुनियादी सहूलतें सरबन्धी मुद्दे पुट्टे। उपमुख्यमंत्री होरें आखेआ जे जनता दरबार नां छड़ा लोकें दी शकैतें गी पुट्टने दा मंच ऐ सगुआं शासन च आम लोकें दी भागीदारी दे साढ़े धेइयै दा इक झलक बी ऐ। एहदे कोला पैहले उपमुख्यमंत्री होरें कालाकोट थमां जम्मू वाया नौशेहरा आली इक बस सेवा गी झंडी दस्सियै शुरू कराया।

<><><><><><>

Rana Udhampur Visit

जलशक्ति मैहकमे दे मंत्री जावेद अहमद राणा होरें कल प्रेस क्लब उधमपुर दा दौरा लाया। उत्थें मीडिया दे मिंबरें कन्नै गल्लबात करदे होई मंत्री होरें लोकें पर असर पाने आले समाजिक मुद्दें गी लेइयै पत्रकारिता दी महत्त्वै आली भूमिका दा जिक्र कीता। उनें पत्रकारें गी पत्रकारिता दी नैतिकता ते सिद्धांतें गी बनाई रखने दी अपील कीती ते एह जकीनी बनाने लेई आखेआ जे हाशिये पर पेदे ते वंचित लोकें दी बुआज गी सुनेआ जा। उनें महत्त्वै आले मुद्दें पाससै ध्यान नुआने लेई मीडिया दी कोशशें दी तरीफ कीती ते शासन च पारदर्शिता ते जवाबदेही गी बढ़ावा देने च अपनी निगरान दी भूमिका जारी रखने लेई पत्रकारें गी प्रेरित कीती।

<><><><><><>

Tawi Arti

जम्मू नगर निगम दे कमीशनर ते जम्मू स्मार्ट सिटी लिमिटेड दे मुख् कार्जकारी अफसर डॉ. देवाश यादव होरें आखेआ ऐ 13 अप्रैल बसाखी दे मौके पर तवि रिवर फ्रंट पर आयोजित सूर्यपुत्री तवि आरती गी लेइयै लोकें च मते उत्साह गी दिक्खदे होई फैसला लैता गेआ ऐ जे इसी इक परम्परा दे तौरा पर नियमित रूपै च आयोजत कीता जाग। उनें आखेआ जे एह फैसला मते थमां मते लोकें गी जम्मू च इस नमीं चाल्ली दी परम्परा लेई आकर्षित करने लेई लैता गेआ ऐ, टकोहदा करियै औंदी अमरनाथें दी यात्रा दरान बी तां जे सूर्यपुत्री आरती मंदरे दे शैहर जम्मू दी इक टकोहदी पुछान बनी जा ते मते मते सैलानी एहदा दर्शन करने लेई इत्थें औन।

<><><><><><>

Mian Disha Meet

सांसद मियां अल्ताफ अहमद लारवी होरें कल राजौरी च जिला विकास तालमेल ते निगरान कमेटी “दिशा” दी बैठक दी अध्यक्षता करदे होई जिले च केन्द्र आस्सेआ प्रायोजित बक्ख-बक्ख स्कीमें दी अमलावरी ते जारी विकास कम्में दी प्रगति ते रफ्तार दा जायजा लैता। बैठक दरान जिला विकास कमीशनर अभिषेक शर्मा होरें उनेंगी बक्ख-बक्ख क्षेत्रें च जारी विकास पैहलें दी स्थिति दे बारे च तफसीली जानकारी दित्ती। मियां अल्ताफ होरें महात्मा गांधी राष्ट्रीय रोजगार गारंटी कनून, प्रधानमंत्री आवास योजना ग्रामीण ते शैहरी, जनजाति कल्याण स्कीमें, ढोस ते तरल कचरा प्रबंधन, राष्ट्रीय ग्राम स्वराज अभियान, संगठित वाटर शैड्ड प्रबंधन प्रोग्राम ते राष्ट्रीय ग्रामीण आजीविका मिशन जनेइए महत्वपूर्ण स्कीमें दी जिले च अमलावरी दे बारे च तफसीली जानकारी हासल कीती। एहदे इलावा उनें राजौरी दे सरकारी मैडिकल कालेज कन्नै कीजे दे बारे च बी पूरी तफसील हासल कीती।

<><><><><><>

Dogri Santha

डोगरी संस्था जम्मू आस्सेआ 2025 बरे दा प्रो. राम नाथ शास्त्री मैमोरियल अवार्ड डोगरी दे नामवर कवि ते संगीतकार ब्रिज मोहन होरें गी दित्ता गेआ ऐ। करण नगर स्थित डोगरी भवन दे कुवंर वियोगी ऑडीटोरियम च लोआए गेदे इक समारोह दरान डोगरी संस्था दे प्रधान पदमश्री ललित मंगोत्रा हुंदी मजूदगी च उनेंगी एह सम्मान दित्ता गेआ। ब्रिज मोहन होरें केई मशहूर गीत लिखे दे न ते केइए दा संगीत बी तैआर कीते दा ऐ। प्रो. रामनाथ शास्त्री अवार्ड उनेंगी उंदी पैहली कताब, कविता संग्रह “मनै दे आले” लेई दित्ता गेआ ऐ। इस सम्मान च प्रो. रामनाथ शास्त्री हुंदे परिवार आलें दी तरफा इक ममेंटो, इक शाल, प्रशस्ति पत्र ते 21 ज्हार रपे नकद दित्ते जंदे न।

<><><><><><>